

06/05/1997

PM beri resipi ekonomi majukan negara

KASANE (Botswana), Isnin - Pemimpin selatan Afrika yang berkumpul di sini untuk merangka strategi memajukan negara masing-masing, sudah mendapat resipi Datuk Seri Dr Mahathir Mohamed membangunkan ekonomi Malaysia.

Dalam pertemuan tertutup itu, pemimpin dari Ghana, Zimbabwe, Tanzania, Botswana, Zambia, Malawi dan beberapa negara lain, yakin resipi Perdana Menteri itu boleh diterima pakai.

Jurucakap delegasi Malaysia, Tan Sri Dr Omar Abdul Rahman, memberitahu wartawan Malaysia di sini, Dr Mahathir memberi penerangan kepada pemimpin berkenaan mengenai pembangunan Malaysia selama 20 minit.

"Mereka mendengar penjelasan Perdana Menteri, terutama mengenai dasar pengswastaaan.

"Dr Mahathir memberi nasihat dan pandangan ikhlas mengenai strategi terbaik untuk memajukan ekonomi dan membangunkan negara di selatan Afrika," katanya yang juga Pengerusi Jawatankuasa Perkongsian Pintar Komanwel mengenai Pengurusan Teknologi.

Antara garis panduan yang dijelaskan Perdana Menteri ialah:

* Mewujudkan iklim pelaburan yang baik untuk menarik usahawan asing menanam modal, selain memberi kemudahan infrastruktur dan pelbagai galakan, termasuk cukai.

* Apabila pelabur asing datang, kerajaan harus pastikan rakyat mendapat faedah dengan memberi peluang pekerjaan.

* Pembangunan ekonomi dan kebudayaan penduduk harus seimbang untuk mengelakkan tidak berlaku kejutan budaya.

(END)